

Organisadonan di Festival di Dande ta yama danki y anuncia siguiente evento

ORANJESTAD - Den nomber di Fundacion Cultural di Festival Folklorico Dande y Himno y Bandera ta extende palabra di bon aña na pueblo di Aruba yena cu dicha y prosperidad. E di 39 festival di Dande cu a tuma lugá dia 27 di december ultimo tabata un éxito y manera ta conoci Ed-jean Semeleer a bira Rey di Dande compaña pa Robert Maduro y su Alma Folklorico y e Reina di Dande a keda den persona di Marlene v/d Linde.

E organisadonan ta mira atras pa loke ta e Propio Composicion cu tambe tabata un éxito na unda Danilo Vrolijk tabata e ganador. Festival Tipico cu Reflexion Band y Tumba di Aña Nobo cu Danilo Vrolijk.

No por keda sin menciona cu cada banda musical cu nan composicionnan tabata di nivel halto.

Fundacion ta felicita cada compositor, arreglista, cantante y agrupacion kendenan a mantene e nivel di e festival hopi halto. Tambe ta gradici e musiconan, cantante, arreglista, hura-donan, Sr. Jubi Naar, Juffr. Leon y e pueblo di Aruba. Tambe na e patrocinadonan RBTT Bank, F.C.C.A., Balashi Brouwerij y Casa Deportivo Mario cu a coopera cu e Festival. Esnan tambe kende a yuda durante e anochi di festival. Den nomber di Fundacion, Presidente Harry Croes ta gradici tur esnan cu a extende invitacion na su persona pa acudi fin di

aña na cendemento de pagara hunto cu Rey di Dande.

Manera ta conoci e aña aki e di 40 festival di Dande lo bira esun di mas grandi den historia di festival di Dande. E lo tuma lugá dia 29 di december. Fundacion ta informa cu e Festival "Un Canto pa Aruba su Himno y Bandera" lo tuma lugá diana 8, 9, 10 y 11 di maart proximo den Piedra

Plat Entertainment Center. Riba e prome 2 dianan lo tin pre-final y e gran final lo ta dia 11 di maart. Dia 10 de maart lo tin un anochi cultural cu canto, show y baile. E festival lo ta pa categoria hubenil y grandi cu AFL. 10.000,== na premio. Lo yama un conferencia di prensa den algun siman. Finalmente un feliz temporada di Carnaval na pueblo di Aruba. □